

Zeitschrift:	Annalas da la Societad Retorumantscha
Herausgeber:	Societad Retorumantscha
Band:	105 (1992)
Artikel:	Società Retorumantscha : Institut dal Dicziunari Rumantsch Grischun : rapport per la perioda dals 1. da schaner enfin ils 31 da december 1991
Autor:	Giger, Felix
DOI:	https://doi.org/10.5169/seals-235714

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.07.2025

ETH-Bibliothek Zürich, E-Periodica, <https://www.e-periodica.ch>

Società Retorumantscha

Institut dal Dicziunari Rumantsch Grischun

Rapport per la perioda dals 1. da schaner enfin ils 31 da decembre 1991.

1. Redacziun e publicaziun

1.1. Redacziun

stgatla 254b	INGIGN – INGIO II	ms.	33	(Gi.)
stgatla 255b	INGUISÀ – INGRANAR	ms.	16	(Se.)
stgatla 255c	INGRANDA – INGRAVAR IV	ms.	71	(Se.)
stgatla 256b	INGRISCHIR – INGUAL I	ms.	61	(To.)
stgatla 256c	INGUAL II – INGÜN I	ms.	95	(To.)
stgatla 257	INGUORD – INISCHER	ms.	68	(Gi.)
stgatla 258	INISPIR – INQUADRATURA	ms.	142	(Wi.)
stgatla 259a	INQUISTA – INSAGLAR	ms.	69	(Se.)
stgatla 260a	INSALASCHAR – INSURZNIR	ms.	25	(Gi.)
		ms.	580	pag.

Il manuscrit da las stgatlas 257 e 260a ha il chauredactur redigì directamain a l'ordinatur, dentant anc senza ils segns spezials da las furmas foneticas. L'ulterieur manuscrit n'è betg scrit cun maschina, uschia ch'il dumber da paginas che mintga redactur ha redigì na sa lascha betg compareglier in cun l'auter ed er betg cun las cifras dals davos onns. La racolta è dentant cuntentaivla, sche nus tegnain quint dal fatg che nus avain gi d'impunder pulit bler temp per terminar il tom 8 e per lavurs preparativas en connex cun l'introducziun da l'ordinatur.

1.2. Publicaziun

1.2.1. Conclusiun dal tom 8

L'emprim quartal ha il chauredactur elavurà e terminà la part I da la «Survista istoric-linguistica», la survista fonetica, dunna *Annatina Secchi* las parts V, C e D «Semantica» ed «Auters fenomens lexicologics» e signur *Kuno Widmer* la part VI «Caracteristica dialectala». Ils 26 d'avrigl avain nus tramess en stamparia las davosas artgas da correctura dal fascichel dubel 115/116 cun ils artitgels INDRIZZAR – INEXTIRPABEL, ils indices e l'introducziun al tom 8 per l'impaginaziun. Ils 19 da zercladur avain nus pudì dar il bun per la stampa. Il fascichel è lura finalmain cumparì a l'entschatta da settember. Il retard è d'attribuir ad incunvegnentschas che la stamparia ha gi en connex cun serrar la veglia partiziun da cumposiziun e midar localitads.

En connex cun l'acziun da laschar liar il tom 8 per ils abunnents hai dà insaquantas malempernaivladads. Nus avevan fixà in pretsch definitiv per laschar cuser ils fascichels en la cuverta dal tom 8. La cuverta dals fascichels è dentant collada vid ils

fegls cun ina colla sintetica che na sa lascha praticamain betg pli allontanar senza donnegiar il carnet. Uschia avain nus decis – encunter veglia – da laschar collar era il tom 8. Nus avain infurmà la stamparia e giavischà ch'ils proxims fascichels veginian collads pli moderadament per ch'els possian propri veginir cusids en la cuverta, quai ch'ins spetga d'in'ovra da quella dimensiun.

1.2.2. Cuntinuaziun da la publicaziun

Sin l'entschatta da zercladur 1991 ha la Stamparia Winterthur SA, che ha stampà noss'ovra a partir dal tom 4, resp. dapi ils 1. da schaner 1966, desditg il contract per la cumposizion tradiziunala. Nus essan vegnids infurmads davart quest pass gia avant 5 onns. En discussiun e cunvegnientscha cun la stamparia avain nus lura decis d'introducir l'elavuraziun electronica da datas, q.v.d. da far er la cumposizion e l'impaginazion en noss Institut (per detagls guarda sut 2.5. Dicziunari ed EED). Cun l'entschatta da schaner da l'onn proxim duess l'infrastructura en noss biros esser uschè avanzada che nus pudain cuntinuar cun la publicaziun dals fascichels 117 e suandants cun ils artigels redigids a partir da la stgatla 252a INFADÀ enfin a la stgatla 260a INSURZNIR cun in volumen da radund 1'000 paginas manuscrit.

1.3. Stab da redacziun

1.3.1. Collauratur

Cun 5 persunas che lavuran a temp cumplain (4 redacturs e la secretaria), 1 persuna che lavura 70% (documentalista) ed insaquantas forzas auxiliaras, engaschadas transitoriamain ed a temp parzial, è il stab redacziunal stà baindotà.

Ils 4 da mars ha signur *Carli Tomaschett* fatg cun success ses examen da doctorat a l'universitat da Friburg. El redegia a temp cumplain dapi il fanadur 1990 ed è vegnì tschernì er formalmain sco redactur a la radunanza dals 3 da matg 1991.

Ils 1. da schaner ha noss anteriur documentalist, signur *Kuno Widmer*, entschavì ses nov pensum da redactur-assistent. Sper las lavurs da redacziun ha el introduci nossa nova documentalista, dunna *Ines Gartmann*, en ses pensum.

1.3.2. Furmaziun dals redacturs

Durant l'onn da rapport avain nus salvà traiss sesidas da furmaziun per ils redacturs.

2. Infrastructura, lavurs internas

2.1. Reordinaziun da la cartoteca maistra

Noss anteriur chauredactur, Alexi Decurtins, rapporta:

Quella lavur, che jeu hai entschiet il mars 1987 (pareglia Annalas 101/1988, 229), va ussa plaunet alla fin.

Praticamein resta ei aunc da repassar las scatlas dalla letra Z, in pensum che jeu vegnel a dumignar senza dubi tochen la fin d'avrel 1992.

En in secund cuors da repassada, numnадамеин cun far las evaluaziuns etimologicas pil BREW, semuossa ei adina puspei ch'ei fuss pusseivel, gie indicau da scarplir l'ordinaziun aunc meglier e pli manedel.

Quella secunda sterigliada resta da mia vart aviarta per la gronda letra S, ch'ils collaboraturs dil BREW, prof.dr. Hans Stricker e Moritz Vögeli, han priu a mauns sezs. Mo era els vegnan a fruntar meinsanual sin damondas delicatas d'apprezziazion e da reponderaziun».

2.2. Excerpts per la cartoteca meistra

Durant l'onn da rapport avain nus excerpà las sequentas ovras: Annalas 103 (ca. 250 cedels); BÜCHLI, *Mythol. Landeskunde III* (ca. 1700 cedels); CADOTSCH, *Gleisch* (ca. 320 cedels); CADRUWI, *Tiaracotga* (ca. 1700 cedels); CADRUWI, *Dieus pertgiri* (ca. 370 cedels); CAMENISCH, *Metamorfosas* (ca. 980 cedels); CAMENISCH/SPESCHA, *Tandem* (ca. 720 cedels); Cud. doctr. 1939 (ca. 1240 cedels); DEVONAS, *Pizza* (ca. 2070 cedels); FRY, *Ovras 3* (ca. 570 cedels); GAUDENZ, *Bagatellas* (ca. 500 cedels); GROB-GANZONI, *Dragun* (ca. 120 cedels); GUIDON, *Michel* (ca. 100 cedels); HENDRY, *Pultengia* (ca. 1030 cedels); HENDRY, *A pèr* (ca. 670 cedels); Manual chatscha E (ca. 400 cedels); PEER, *Grond Corradi* (ca. 300 cedels); *Sün fanestra* (ca. 250 cedels); THÖNI/SIGRON, *Utschels* (ca. 165 cedels); VINZENS, *Monas* (ca. 1020 cedels); Voc. Surm. INNOVAZIUN – ZVITG (ca. 7000 cedels). En tut avain nus excerpà radund 20'000 cedels. Noss anteriu documentalist, signur *Kuno Widmer*, ha cintinuà er sco redactur-assistent cun sia laver d'excerptar la pressa rumantscha actuala.

Circa la mesadad da quest material era già deponì en la cartoteca maistra a l'entschatta da november, cur ch'ils redacturs han entschavì a deponer sez il rest, oravant tut il material dal Voc. Surm., mintgin almain in mez di l'emna. Cun questa chaschun avain nus fatg ina scuverta malempernaivla ch'ha manà a la conclusiun che dad uss ennà sulettamain ils redacturs astgan deponer material en la cartoteca maistra: i mancan fitg blers renviaments. Spezialmain las furmas surmiranas mancan fetg savens, ma er bleras sursilvanas. En la stgratla 700 p.ex. hai jau già d'aggiuntar 47 renviaments da furmas surmiranas regularas or dal Voc. Surm. Per ca. 30% da las expressiuns ord quest vocabulari ston ins scriver renviaments.

L'opiniun da la redacziun è quella che almain las furmas standardisadas or dals vocabularis regiunals stuessan cumparair cun in renviament sin il lemma. Noss sistem da renviaments è manglus ed inconsequent. Noss dain renviaments da furmas irregularas ord la litteratura ed avain sper quai grondas largias en quai che pertutga las furmas regularas or dals vocabularis. Noss sperain da pudair curreger quai cun laschar excerptar er ils bustabs *a-b* dal Voc. Surm. e da concentrar en il proxim temp ils excerpts sin la litteratura surmirana, sutsilvana e sursilvana. Cun il temp stuess ins uschia pudair stuppar almain per part las rusnas en la rait dals renviaments.

Er suenter la gronda e stentusa laver da reordinaziun dals davos onns èsi necessari che mintga redactur examineschia minuziusamain las stgratlas ch'el redegia, saja quai per cumplettar ils renviaments, saja per reponderar la lemmatisazion u per curreger ils sbagls ch'en success cun deponer material.

2.3. Cataloghisaziun dals manuscrits che sa chattan a l'Institut dal DRG

L'onn passà n'avain nus betg già peda da cuntinuar cun la cataloghisaziun da noss manuscrits che nus avevan entschavì il schaner 1990 e ch'era progredida fitg bain. Nossa cataloghisatura, dunna *Ines Gartmann*, ch'è dapi il schaner 1991 nossa documentalista, ha già d'impunder ses temp da lavur per chaussas pli urgentas. Nus sperain da pudair cuntinuar e forsa finir questa lavur l'onn proxim.

2.4. Forzas auxiliaras

Signur *Felix Lautenschlager* che ans ha bandunà a la fin da mars è sa deditgà a la lavur d'excerpar ils chavazzins dal Voc. Surm. a partir da INNOVAZIUN – ZVITG. Questa lavur ha el fatg a chasa a partir dals 14 da schaner enfin il di da sia relaschada.

Dunna *Gunhild Hoyer* ha lavurà parzialmain a partir da l'entschatta schaner enfin ils 15 da zercladur. Ella è s'occupada dals excerpts dals cudeschs PEER, *Grond Corradi*, GROB-GANZONI, *Dragun*. Ultra da quai ha ella suitta ritgà ed excerptà ils cudeschs BÜCHLI, *Mythol. Landeskunde III*, *Sün fanestra* e GUIDON, *Michel* ed ha gidà a deponer material en la cartoteca maistra ed en il register da materias.

Dals 24 avrigl enfin ils 24 da zercladur ha signur *G. Giachen Furer*, Zignau, excerptà litteratura per nus. El ha lavurà a chasa, dentant en moda fitg intensiva e conscienuza, ed el ans ha furnì en quels dus mais passa 7'000 cedels cun ritgas infurmaziuns e scrits tuts cun maschina.

Dals 7 d'october enfin ils 1. da november ha dunna lic. fil. *Ursina Saluz* da Lavin deponì material d'extracts en la cartoteca maistra, avant ch'ir a Turitg sco collavuratura dal BREW.

2.5. Dicziunari ed EED

2.5.1. Concept, apparaturas e programs

La dumonda davart il concept, las apparaturas ed ils programs per l'EED è sclerida. Nus avain decis da cumprar ordinaturs Macintosh da l'interpresa TNC, Cuira, che ans porscha rabats da scola sin ils pretschs currents. Ils 10 da schaner avain nus lura cumprà noss emprim ordinatur, in Macintosh Classic, per il pretsch da scola da ca. 2'500.– frs., inclus il program Word 4.0. Il mars avain nus obtegnì il stampader Laser per il pretsch da 7'035.– frs. e la fin da matg il segund Macintosh, sistem IIci (80MB HD, 1.4MB DD, 5 MB RAM) inclus il monitür (format A4 ner/alu) per l'import da 9'014.– frs. Nus avain decis da spetgar cun la cumpra d'ulteriurs apparats enfin che nus avain créà, installà e mess en funcziun ils segns spezials che nus duvrain per l'elavuraziun electronica da texts.

Ils 5 da fanadur avain nus incumbensà l'interpresa turitgaisa Prepress Informatic SA, ina filiala da la Stamparia Winterthur SA, da crear ils segns fonetics ed ils segns spezials. A la fin d'october avessan nus già d'obtegnair els. En avust han ins communitgà a nus che l'interpresa saja vegnida schliada per motivs da restructuraziun. Nus avain lura pudì far in contract sin basa privata cun signur Richard M.H. Hirsch, in anterius collavuratur da la Prepress che ans ha garantì da terminar la lavur da basa enfin la mesedad da december. Ils 10 d'october ha el preschentà a l'Institut ils segns spezials che duvravan be anc pitschnas retuschas. La demonstraziun da la configuraziun da la

tastatura, il pensum difficil da la laver, è fixada per la mesada dal schaner 1992. Nus sperain che mintga redactur possia entschaiver la fin da schaner cun la redacziun a l'ordinatur. Cun las 68 paginas da la stgatla 257 ch'èn gia dadas en l'ordinatur vegnин nus a far las emprovas da controlla necessarias. Jau na fetsch naginas prognosas davart l'appariziun dal fascichel 117.

2.5.2. Finanziaziun

Sin nossa dumonda da l'onn passà da sustegnair las midadas en la preparaziun per la stampa dal Dicziunari Rumantsch Grischun ha il chantun decis da subsidiar questa laver cun l'import da 40'000.– frs. (brev dals 16 d'avrigl 1991).

3. Lavurs externas

Noss redactur-assistent, signur *Kuno Widmer*, e nossa documentalista, dunna *Ines Gartmann*, han cumpilà l'entschatta da l'onn la «Tscherna bibliografica», la glista da las publicaziuns per las Annalas 104 (1991) che cumpiglia 16 paginas stampadas e 237 titels.

Nossa secretaria, dunna *Alexa Arquisch*, ha fatg la cumposiziun criva da l'entir text da las Annalas 1991 sin noss ordinatur (exclus il rapport da la LR). La laver è vegnida retschavida cun cumpliment da la stamparia Grafiscrit SA, Puntraschigna.

Sper quella incumbensa ha ella scrit a l'ordinatur ca. 800 paginas dals dus toms 8 e 9 da la Romanica Raetica, deditgada a las ovras d'Alexi Decurtins, e fatg cuntinuadament las correcturas inditgadas da l'autur.

Il novembre ha ella fatg la spediziun dals toms 8 che noss abunents han laschè liar per il pretsch reduci che nus avain pudì offrir tar la liaria Burkhardt SA, Mönchaltorf-Turitg, perquai che la liaria n'ha betg vulì surprender questa laver.

A la fin da november e l'entschatta da december ha ella fatg la spediziun da las Annalas ensemble cun nossa cassiera, dunna Genoveva Seger-Arquisch.

4. Collauraziun dal DRG al project BREW (Bündnerromanisches etymologisches Wörterbuch) dal Fond naziunal

Noss anterius chauredactur, prof. dr. Alexi Decurtins, la persuna da confidenza da l'Institut per las relaziuns cun il BREW e collauratur da quest, rapporta:

El decuors digl onn 1991 bai jeu furniu als collaboraturs dil BREW a Turitg las informaziuns per las letras T, U, V e circa ina tiarza dalla letra P. Jeu cuntinueschel ussa cun quellas e sperel da vegnir a riva cuntut tochen la fin d'avrel.

Ei vonza aunc la letra Q (mo paucas scatlas) e la gronda letra S ch'ils signurs prof. dr. Hans Stricker e Moritz Vögeli ein gest vidlunder d'evader.

Sil termin numnau (fin d'avrel 1992) fuss jeu leds da survegnir il sboz da redacziun dalla letra L; ton per saver compareglier il resultat cun mias informaziuns ed oravontut che jeu sappi segidar cun remarcas e commentaris vid il text da redacziun sez e sia fuorma definitiva. Ina entschatta che stuess lu vegnir extendida silsuenter era sigl ulterior manuscret.

En ina seduta ensem en cun prof. dr. Hans Stricker e la suprastonza dalla Societad per la perscrutaziun da la cultura grischuna, dirigida da Georg Jäger, hai jeu saviu far valer la prestaziun nundiscutabla dalla Società Retorumantscha/Dicziunari Rumantsch Grischun alla impostaziun e redacziun da quell'ovra. Gest en vesta alla finanziaziun dall'ovra suenter 1992 pareva quella, sco igl ei seresultau ella discussiun, da passare en emblidonza».

Prof. dr. Hans Stricker, iniziant e directur dal BREW, communitgescha:
«Sebasond sin las lavurs dils emprems dus onns da project ha la squadra dil BREW menau vinavon la registraziun ed integraciun dallas datas recaltgadas.

Madirs per la correctura ein ils artechels da plaids derivonts ord la part publicada dil DRG (A-I), plinavon ord il material nunpublicau ils bustabs J-O, R, T, V, Z. En lavour ein actualmein las letras Q, S e V. Las etimologias problematicas ein per part aunc pendentas.

Ils problems che stattan en connex cun la preparaziun per la stampa (scartira speciala per il stampader laser) ein pli u meins sligai.

Medemamein havein nus cuntinuau la recaltgada da datas en las cartotecas dil DRG. Il sutsignau planisava da separticipar pli intensivamein da quella lavourton indispensabla sco impegnativa, el rom d'in semester liber duront la stad 1991, vulend cheutras levgiar per in ton la carga da nies collaboratur prof. Alexi Decurtins. Per motivs da sanadad ha el deplorablamein saviu realisar quella intenziun mo per part; el sesprova denton vinavon da semetter els stадals ton sco pusseivel.

Per la fin da settember 1991 ha gfra. Ruth Bernardi, lic. fil., da Gardena bandunau nus suenter ina collavur fritgeivla ed emperneivla da treis onns. En siu stagl havein nus retschiert en nossa squadra la dna. Ursina Saluz, cand. fil.

Sco colluvrers centrals fungheschan vinavon ils signurs Moritz Vögeli, lic. fil., e dr. Wolfgang Eichenhofer.

Il sutsignau vuless engraziar grondamein a tut(ta)s collaboratur(a)s da lur preziada lavour pertada d'in idealissem remarcabel.

Grond engraziament meretan era la SRR ed il caporedactur DRG, dr. Felix Giger, per lur survetscheivladad, lur capientscha ed igl esch aviert».

5. Relaziuns publicas

5.1. Visitas, infurmaziun

Ils 10 d'avrigl ha gi lieu a Turitg a l'institut dal Schweizerisches Idiotikon in «di dals vocabularis». La redacziun da l'Idiotikon ha envidà las redacziuns dals ulteriurs tra is vocabularis naziunals ad in di da visita e discussiun. Nus avain gi la pussaivladad da prender invista da l'institut a Turitg e da discussiunar problems communabels e specifics, oravant tut davart l'introducziun da l'elavuraziun electronica da datas, realisada cumplainamain tar il Vocabolario, realisada per part tar l'Idiotikon e planisada tar il Glossaire.

Ils 23 d'avrigl ha pader *Alois Kurmann* da Nossadunnaun visità il Dicziunari cun ina classa dal collegi.

Ils 8 da matg ha prof. *Nobuo Tomimori*, docent da la romanistica a la Tokyo University of Foreign Studies en il Giapun, visità noss Institut. El ha demussà in interess particular per il sistem d'elavuraziun da text che nus avain adoptà e fiss pront da cumprar ils dretgs da licenza per noss segns spezials.

Il medem di è arrivà prof. *Chasper Pult* cun ina classa dal seminari per prender invista en las ovras da Bifrun e Champel.

Ils 15 da matg avain nus preschentà noss Institut a prof. *Theodor Rifesser* da las Dolomitas ed a traís ulteriuras persunas che l'han accumpagnà sin ses viadi da studi tras il Grischun.

Ils 31 da matg ha spluntà dr. *Clemens Pally* cun 7 scolars da ses curs da rumantsch.

Ils 3 da zercladur avain nus retschavì dunna *Agata Svarc*, lectora da tudestg a l'Institut germanistic da la facultad filologica da l'universidad da Belgrad, sin viadi da studi tras la Svizra, organisà da la Pro Helvetia.

Ils 13 da zercladur sa preschentan 7 persunas dal gimnasi da Ditzingen sper Stuttgart. Ils 16 da fanadur arriva prof. dr. *Arnold Spescha* cun 6 participants dal curs da sursilvan a l'universidad da Turitg.

Ils mais da zercladur, fanadur ed avust avain nus dà albier a la studenta dunna *Victoria Popovici* da Bucarest ch'è sa deditgada en quest temp al studi dal rumantsch, ha duvrà nossa biblioteca e consultà noss material.

Dunna *Esther Krättli*, studenta da la romanistica a l'universidad da Turitg, è s'occupada da lavurs d'infurmazion per il BREW dals 24 da zercladur enfin ils 31 da fanadur.

Dunna *Erika Bodenwinkel*, studenta da la romanistica a l'universidad da Berna, ha lavurà en noss Institut l'emna dals 28 d'october enfin ils 2 da november per sia lavur da licenziat davart receipts e spaisas rumantschas tar prof.dr. Ricarda Liver.

Differents dis en il decurs da la primavaira e da l'atun ha signur *Leo Tuor* fatg tar nus retschertgas e controllas bibliograficas en connex cun la lavur davart la vita e l'ovra da Giachen Caspar Muoth.

Dapi la stad lavura periodicamain prof.dr. *Hans Stricker*, dapi l'entschatta da november era signur *Moritz Vögeli* per il BREW en nos biros.

La saira dals 5 da december avain nus preschentà l'Institut a ca. 20 commembars da l'Uniun dals Grischs (secziun Cuira).

Ils 10 da december ans ha visità prof. *Isidor Winzap* cun ina classa da patenta dal seminari da scolasts.

5.2. *Colloquis*

L'emna dals 15 enfin ils 19 d'avrigl ha il chauredactur prendì part dal colloqui internaziunal davart ils problems da la standardisaziun da linguatgs, organisà da

l'Academia Svizra da las scienzas moralas (ASSM). Cun questa chaschun han ca. 15 participantas e participants da differentas naziuns visità noss institut.

5.3. Exposiziun «Heureka»

A l'exposiziun «Heureka» a Turitg è il Dicziunari stà preschent cun ina vitrina, nua ch'ils toms 1 – 7 èn vegnids exponids, e cun ina tavla intitulada «Sa metter en giuf» che ha illustrà noss artitgel «giuf» e cun quel la furma ed il concept da noss'ovra.

5.4. Referats, publicaziuns

F. Giger

- *Vorteile und Chancen des Rumantsch Grischun.* Referat salvà al «Istitut ladin Micurà de Rü» a San Martin de Tor, Val Badia, ils 1. zercladur 1991.
- Preschentaziun dal cudesch da Gion Deplazes: *Die Rätoromanen. Ihre Identität in der Literatur.* (Desertina, Mustér 1991), en: Litteratura 14, p. 263 – 269.

C. Tomaschett

- *Die Orts- und Flurnamen der Gemeinde Trun. Mit einem siedlungsgeschichtlichen Überblick.* Romanica Raetica 7. Società Retorumantscha + Institut dal Dicziunari Rumantsch Grischun, [Cuera] 1991 (diss. Friburg).

Cuira, ils 31 da december 1991

Institut dal DRG
Felix Giger